



Broj: 46/I-19  
Sarajevo, 18. januar 2019

## S A O P Š T E N J E    Z A    J A V N O S T

### Podsjećanje na zločine osuđenog ratnog zločinca Valentina Ćorića


Osuđeni ratni zločinac Valentin Ćorić, koji je iz Haškog pritvora pušten 16. januara 2019. odsluživši 2/3 kazne, od juna 1992. do 10. novembra 1993. bio je načelnik Uprave Vojne policije Hrvatske zajednice Herceg-Bosna. Imao je velike ovlasti *de iure* i *de facto* nad svim jedinicama Vojne policije u HVO-u. Imao je ovlasti da učestvuje u borbi protiv kriminala u HVO-u. Bio je nadležan za kontrolisanje protoka osoba i roba na teritoriji Herceg-Bosne i konvoja s humanitarnom pomoći. Raspolagao je važnim ovlastima nad funkcionisanjem mreže koncentracionih logora i zatočeničkih objekata HVO-a i do 10. novembra 1993. igrao je ključnu ulogu u njihovom funkcionisanju. U okviru svojih funkcija svjesno je angažovao jedinice Vojne policije u operacijama deložiranja, u okviru progona i "etničkog čišćenja" Bošnjaka i Srba, između ostalog i u Mostaru u razdoblju od maja do oktobra 1993. ne hapseći pritom počinioc deložacija. Doprinio je držanju, pod teškim uslovima, više hiljada Bošnjaka u zatočeništvu tokom kojeg su premlaćivani, zlostavljani i ponižavani. Redovno je nalagao ili dopuštao da se koriste za prisilni rad. Uprkos alarmantnim informacijama koje je dobivao, ništa nije poduzeo da bi spriječio da se zatočenci s Heliograma šalju na prisilni rad na linije fronta, te su mnogi od njih ubijeni ili ranjeni.

Ćorić je bio važna karika u udruženom zločinačkom poduhvatu. Zajedno s Matom Bobanom, a po direktivi Franje Tuđmana i Gojka Šuška, od 18. novembra 1991. do aprila 1994. učestvovao je u udruženom zločinačkom poduhvatu čiji je krajnji cilj bio uspostavljanje hrvatskog entiteta, djelimično u granicama Hrvatske banovine iz 1939. godine. Taj hrvatski entitet u Republici Bosni i Hercegovini trebalo je ili da se pripoji Hrvatskoj nakon eventualnog raspada Bosne i Hercegovine,

ili da postane nezavisna država unutar Bosne i Hercegovine, tijesno povezana s Hrvatskom. Da bi se taj cilj sproveo, imao je namjeru ostvariti zajednički zločinački cilj - da se protjera bošnjačko stanovništvo i počine zločini. Za uspostavljanje hrvatskog entiteta neophodno je bilo promijeniti nacionalni sastav stanovništva, što su vlasti HZHB-a planski i sistematski provodile posebno metodama prisilnog protjerivanja stanovništva, iseljavanja bošnjačkog i naseljavanja hrvatskog stanovništva. U ostvarivanju tih planiranih ciljeva vršili su radnje koje su za posljedice imale različite i najteže oblike zločina protiv čovječnosti i međunarodnog prava.

Čorić je pred Haškim tribunalom proglašen krivim i osuđen na kaznu zatvora od 16 godina. Osuđen je po 22 tačke od ukupno 25 tačaka optužnice, koja mu na teret stavljaju teška djela.

DIREKTOR

  
Dr. Fikret Bećirović, viši naučni saradnik